

Epes

Pawre kot Epes kãm Jejus kôt hkwỳjê hwỳr kagà nẽ mẽn

Pawre na pre kagàja nhĩpêx. Jejus nhỹ hã hkrajê jahkre o pa xwỳnhjê hõ na pre. Jakamã na pre krĩ pê Epes kãm Kris kwỳjê hwỳr hipêx nẽ kumê. Epes nhõ xwỳnhjaja Ijaew kêt xwỳnh na pre mẽ. Nhũm pre ra Pawre ma mẽ hwỳr mõ nẽ mẽ kãm Tĩrtũm kapêr jarênh o ri mẽ hkôt pa nhũm mẽ hkwỳjaja kuma nẽ Jejus kôt amnhĩ xunhwỳ.

Na pre hte Pawre ma krĩ piitã hkôt ri Tĩrtũm kapêr jarênh o ri mẽ hkôt pa. Hãmri nhũm mẽ hkwỳjaja Jejus ã unê nẽ krĩ pê Rõm wỳr kumê nẽ kamã haxà nhũm arĩ hkrĩ ho hkrĩ. Nom amarĩ hkrĩ hkêt nẽ. Na pre hte mẽ kot hwỳr mrar xwỳnhjê mã Tĩrtũm kapêr jarê. Nẽ krĩ hkwỳ hkôt Jejus kôt hkwỳjê mã kagà nhĩpêx nẽ mẽ hwỳr kurê. Jakamã na pre Epes kamã hkwỳjê hwỳr kagàja nhĩpêx nẽ mẽ hwỳr kumê.

Nẽ kagàja kamã hprĩ hã mẽ kot Jejus kôt amnhĩ xunhwỳr xwỳnhjê kot tanhmã amnhĩ nhĩpêx to ho pa hã mẽ kãm karõ. Ra mẽ kot hkôt amnhĩ xunhwỳr jakamã te mẽ htipxi nẽ ri mẽ pa xwỳnh kot amnhĩ nhĩpêx pyrãk o amnhĩ nhĩpêx o pa hã mẽ kãm hã karõ. Nẽ jar pika hkôt te mẽ kêp Kris nhĩ pyrã nẽ pa hã mẽ harê. ã na pre Pawre mẽ kãm mêmoj jarê nẽ hã kagà anê nẽ mẽ kãm:

¹ Pa Epes kãm Kris kôt ixkwỳjaja. Xà mẽ amex na ka mẽ apa? E ot pa mẽ awỳr kagà nhĩpêx nẽ kumê.

Ixpê Pawre na pa hipêx nê mẽ awỳr kumê. Ixpê Jejus Kris nhỹ hã mẽ ahkre ho mẽ ixpa xwỳnh na pa. Tĩrtũm kãm hprãm xà hkôt. Tã pa ã mẽ awỳr kagà nhĩpêx nê mẽ awỳr mênh anê. Mẽ apê Tĩrtũm krajê hwỳr. Na ka xep htem Jejus Kris kôt amnhĩ nhĩpêx mex o ri apa. ãm hãmri na ka htem ã amnhĩ nhĩpêx anê.

² E kê Mẽpahpãm Tĩrtũm mẽ Pahihti Jejus Kris wa mẽ ato mex nê mẽmoj to mẽ akutã nojarêr rãhã ho pa. Ka mẽ wa ỹ hã axãmnhĩx ajamakêtkati nê akĩnh pê tanhmã amnhĩ nhĩpêx to ho ri apa.

Tĩrtũm kot mẽ pakukamã amnhĩm mẽ parênh ã harênh

Rômãn 8.28-30; Wam Korĩt 1.21-22; Wam Tesarôn 1.4; Sikũn Tesarôn 2.13; Wam Pêtre 1.2

³ Na hte mẽ panhõ Pahihti Jejus Kris nhĩpêxã Tĩrtũmja mẽ pahto mex rãhã ho pa. Mẽ pahpê Kra Kris kwỳ hã mẽ pahpumunh kôt tanhmã mẽ pahto mex to ho pa. Ra wa Karõja mẽ pahkarõ mã gjêx jakamã te ra mẽ pahte kaxkwa kamã wa kuri mẽ pamex nê mẽ papa pyræk. Tã ra mẽ pahte jar pika ja kamã paxãmnhĩx pajamakêtkati mẽ pamex nê ri papa jakamã kwa kêr pu mẽ amnhĩm ãm mex o mex ã harênh rãhã nê.

⁴⁻⁵ Amnepê mã kormã mẽmoj kêr ri na pre Tĩrtũm mẽ pakukamã amnhĩm mẽ parê. Kris kukwak ri amnhĩm mẽ parê. Tã mẽmo kaxyw na pre ã mẽ pakukamã mẽ parênh anê? ãm mẽ pahte kapêr kôt pix mã amnhĩ nhĩpêx o ri papa kaxyw. Jao tãm kot amnhĩ nhĩpêx pyrã nê noo mã tãm amnhĩ nhĩpêx o ri papa. Kãm mẽ pajapê jakamã na pre mẽ pakukamã tanhmã hamaxpêr to nê hamaxpêr o:

—Nà Ixkra Jejus Kris koja nhÿrmã ma mẽ hwÿr wrÿ nẽ mẽ nê ty. Tã mẽ kot mẽ nê htyk ã harênh mar nẽ amnhĩ kaxyw hkôt hamaxpêr xwÿnhjaja kot paj mẽ ho ixkra. Nà kot paj ã mẽ hipêx anê. Anê.

⁶ No mẽ papajaja tanhmã mẽ pahte amnhĩ nhĩpêx mex to hã mẽ pahpumunh kôt na pre ã mẽ pahto hkra hã mẽ pajarênh anhÿr kêt nê. ãm Kra Kris pix kukwak ri na pre ã mẽ pajarênh anê. Kãm Kra japê jakamã na hte mẽmoj to mẽ pahpê hkwy hã mẽ pakutã nojarêr rãhã ho pa. Jakamã na pu htem amnhĩ tã kãm mex o mex ã harênh o papa.

⁷⁻⁸ Na pre Krisja mẽ panê htyk o Tĩrtũm mã mẽ pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhĩpêx anhÿr ã omunh xà hkôt mẽ pahte hkôt amnhĩ xunhwÿr xwÿnhjê nê mẽ pahte amnhĩ tomnuj rênh pa. Koja aa tanhmã hã mẽ pahto hkêt nê. Pu mẽ axte amnhĩ amnhĩ tomnuj o papa hkêt nê. Hêxta waa nê. Kãm mẽ pajapê htÿx kumrêx jakamã na pre ã mẽ pahto mex rax anê. ãm mex o mex nê àhpumunh o àhpumunh.

⁹⁻¹⁰ Amnepêm na pre hamaxpêr o:

—Nà na pa ra kaxkwa ho ixkato nê kamã mẽmoj piitã ho ixkato. Nê pika ho ixkato nê kamã mẽmoj piitã ho ixkato. Tã koja nhÿrmã Ixkra Kris mẽmoj piitã ho amnhĩptàr o pa. Kaxkwa kamã nê pika piitã hkôt mẽmoj piitã ho amnhĩptà nê tapxipix inhÿ hã kêp mẽõ Pahihti. Koja ã amnhĩ nhĩpêx anhÿr xà hã arĩgro kato nhũm ã amnhĩ nhĩpêx o pa anê. Nà ja na inhmã hprãm. Anê.

ã Tĩrtũm amnhĩ kukamã hamaxpêr anhÿrja kôt na pre Kris kêp mẽ panhõ Pahihti hã harê.

Tã nhÿrmã mẽ pahto amnhĩptàr kaxyw koja mẽ pakaxyw ãm. Amnepêm ri mẽ pa xwÿnhjê mã kot kormã ja ho amnhĩrĩt kêt tã ra jarãhã mẽ pamã ho amnhĩrĩt.

¹¹ Kris kukwak ri na pre amnhĩm mẽ parê. Ra kot mẽ pakukamã mẽ pahtã amnhĩ jarênh xà hkôt.

¹² Tã mẽ ixpê Ijaew kwÿ kumrêx mẽ ixte Kris kôt amnhĩ xunhwÿr jakamã koja mẽ piitã mẽ inhÿ hã Tĩrtũm mã mex o mex ã harênh o ri pa.

¹³ Nê mẽ kajaja na ka prem mẽ ixpyrà nê Tĩrtũm kapêr ma nê ajaxwÿja hkôt amnhĩ xunhwÿ. ãm hãmri na Tĩrtũm kapêrja. Tã ka prem ama nê hkôt amnhĩ xunhwÿ. Hãmri nhũm amnhĩ tã mẽ apumu nê kot inhĩpêx pyrà nê mẽ anê mẽ ate amnhĩ tomnuj piitã rênh pa nê mẽ ato hkra. Hãmri nê mẽ awÿr Karõ rê nhũm mẽ awÿr wrÿ nê mẽ akarõ mã agjê nê mẽ akamã pa ho pa. Kris kukwak ri na pre mẽ awÿr kurê. Amnepê mã na pre mẽ pakukamã hamaxpêr o:

—Koja mẽ Ixkra hkôt amnhĩ xunhwÿ pa ja hã mẽ omu nê mẽ ho ixkra nê mẽ hwÿr Ixkarõ rê. Hãmri nhũm mẽ hkarõ mã agjê nê mẽ kamã hkrĩ ho hkrĩ.

¹⁴ Anhÿr jakamã na pre mẽ pahwÿr kurê nhũm mẽ pahwÿr wrÿ nê mẽ pahwÿr agjê nê mẽ pakamã hkrĩ ho hkrĩ. Pu mẽ ja hã amnhĩ pumu nê pajamaxpêr o:

—Nà ra Tĩrtũm kot ixwÿr Karõ mênh jakamã na ixkarõ hwÿr axà nê kamã hkrĩ ho hkrĩ. Tã koja ra kot mẽ ixtã amnhĩ jarênh xà hkôt ja hã ixto mex nê. Ra kot ixto hkra kênã. Jakamã koja nhÿrmã ma amnhĩ wÿr ixto api pa kuri inhmex kumrêx nê ixpa ho ixpa. Hãmri nê kukwak ri axte tanhmã amnhĩ tomnuj to ho ri ixpa hkêt nê. Anê.

Jakamã koja mẽ piitã ã kot mẽ ho mex anhÿr ã amnhĩ tã kamã ama nẽ amnhĩ tã omu nẽ kãm mex o mex ã harẽnh rãhã ho pa.

Pawre kot Epes nhõ xwÿnhjê ho Tĩrtũm wÿr ã harẽnh

Pĩripos 1.9; Korosẽ 1.9-12; Wam Tesarõn 5.23; Sikũn Tesarõn 1.11, 2.16; Eprêw 13.20

¹⁵ Nẽ na ka xep htem amnhĩ kaxyw Kris kõt ajamaxpêr tÿx pê amã Tĩrtũm krajê piitã mẽ hkĩnh o mẽ ho mex o apa. Na pa pre mẽ ajarẽnh ma nẽ ixkĩnh tÿx nẽ.

¹⁶⁻¹⁸ Nẽ xatã mẽ ato Tĩrtũm wÿr o ri ixpa nẽ mẽ ato hwÿr o:

—Pa Mẽinhĩpêêxà maati Tĩrtũm. Nà amex o amex. Ka na ka pre mẽ ixwÿr mẽ inhõ Pahшти Jejus Krisja mẽ nhũm mẽ ixwÿr wrÿ nẽ hprĩ hã mẽ inhmã ate tanhmã amnhĩ nhĩpêx to ho apa hã ato amnhĩrĩt. Tã Epes kãm akrajaja na xep htem akõt pix mã ri amnhĩ nhĩpêx rãhã ho ri pa. ãm hãmri na htem ã amnhĩ nhĩpêx anẽ.

—Nẽ kwa Tĩrtũm. Kê Akarõ tanhmã mẽ hkrã hto kê mẽhprĩ hã akapêr mar tÿx rãhã ho pa. Jao ra ate mẽ ixkukamã mẽ ixtã tanhmã mẽ ixto mex to hã amnhĩ jarẽnhja kê mẽ kãm hamaxpêr tÿx rãhã ho pa. Nẽ ate nhÿrmã mẽ ixpê akrajaja mẽ ixpiitã tanhmã mẽ ixto mex to jarẽnhja kê mẽ kãm hamaxpêr tÿx pê hkĩnh rãhã ho pa ho pa.

¹⁹⁻²⁰ —Nẽ kê mẽ axàhpumunh o axàhpumunh ã ate akupÿm Akra Kris o htĩr ã apumunh mex nẽ Tĩrtũm. Na ka pre axàhpumunh xà ho akupÿm ho htĩr nẽ ma akupÿm anhõ krĩ hwÿr ho api nẽ amnhĩ nhĩhkõ hã ÿr nhũm arĩ hkrĩ ho hkrĩ. Apyrà nẽ kot mẽ ixto amnhĩptàr kaxyw. ã axàhpumunh xà

htỳx kot anhỳr. Tã kê akrajê piitã ja hã apumu nẽ axàhpumunh tỳx o ate tanhmã mẽ ixto ajuta hto ho apa hã apumu.

Anhỳr o na pa hte mẽ ato hwỳr o ri ixpa.

²¹ Nẽ Krisja àhpumunh tỳx o mẽkarõmnuti piitã hakrenh. Nẽ hihtỳx o mẽ hakrenh jakamã krĩ nhõ xwỳnhjê mã te mẽ àhpumunh tỳx kêt pyràk o na htem htỳx ri amnhĩ nhĩpêx o pa pyràk. Nẽ Krisja hihtỳx o pika piitã hkôt pahi piitã mẽ hakrenh par kumrêx. Nẽ hihtỳx o kot pika piitã hkôt mẽmoj piitã mẽ hakrenh par. Jakamã mẽhõ koja we tanhmã kot amnhĩ nhĩpêx to hã kãm karõ rỳ kãm hamaxpêr gõ? Nà amrakati kumrêx. Ra kot ã amnhĩ nhĩpêx anhỳr rãhã nẽ pa ho pa xwỳnh kênã. Nẽ hihtỳx o hihtỳx rãhã nẽ pa ho pa xwỳnh. Nẽ àhpumunh o àhpumunh rãhã nẽ pa ho pa xwỳnh. Nẽ hihtỳx o kot jar pika ja kôt mẽ pajakrenh par nẽ hihtỳx o Tĩrtũm nhõ krĩ kamã mẽ mẽmoj piitã hakrenh par. Tã koja mẽmoj piitã ho amnhĩptàr rãhã htĩr tũm nẽ pa ho pa.

Kris te kêp mẽ pahkrã pyràk ã harênh

Rõmãn 12.4; Wam Korĩt 12.12; Epes 4.16; Korosẽ 3.25

²² Na pre Tĩrtũmja Kra Kris nhĩhkram mẽmoj piitã haxàr pa. ỳ hã kot nhỹrmã ho amnhĩptàr o pa kaxyw. Jakamã kot mẽ pahto amnhĩptàr xwỳnh ã kêp mẽ panhõ Pahihti. Nẽ te kêp mẽ pahkrã pyràk. Nẽ mẽ papajaja te mẽ pahpê ã pyràk jakamã na pu htem hkôt ri amnhĩ nhĩpêx o papa.

²³ Na hte mẽ panhija mẽ pahkrã kamã mẽ pajamaxpêr xà hkôt tanhmã amnhĩ nhĩpêx to. Ja pyrã nẽ na pu htem mẽ pahkrã pyràk xwỳnh Krisja

kapër ma nẽ hkõt tanhmã ri amnhĩ nhĩpêx to ho ri papa.

Koja mẽhõ ãm hkrã pix nẽ ï hkêt nẽ pa hãmri nẽ mex kêt nẽ. Na htem hkrã nẽ mãñnẽn ï nẽ pa nẽ mex nẽ. Ja pyrã nẽ na hte Kris mẽ pahte hkõt amnhĩ nhĩpêx o papa hã mẽ pahpumu nẽ hkĩnh nẽ mex nẽ pa. Pu mẽ pajaxwýja hkõt ri amnhĩ nhĩpêx ã amnhĩ pumu nẽ pahkĩnh nẽ pamex nẽ papa ho papa.

2

*Tanhmã Tĩrtũm kot mẽ pahto hkra hto ã harẽnh
Wam Korĩt 6.11; Xitre 2.11-3.7*

¹ Nẽ amnepê mã na pu pre htem Tĩrtũm kàx ã tanhmã amnhĩ tomnuj to ho ri papa.

² Nẽ jar mẽ kot amnhĩ nhĩpêx o amnhĩ nhĩpêx. Jao amnhĩ tomnuj pix o ri papa. Nẽ mẽkarõmnuti nhõ pahi Satanasti kapër kõt pix mã ri amnhĩ nhĩpêx rãhã nẽ. Na pre hte tanhmã mẽ pahkõt mẽ pahto ho pa. Mẽ pahte tanhmã amnhĩ tomnuj to kaxyw mẽ pamã mẽ pajamaxpër punuj jagjê. Pu mẽ amnhĩ tã omunh kêt tã ý hã amnhĩ tomnuj o papa. Satanastija kêp mẽ kot Tĩrtũm kapër kwým ri amnhĩ nhĩpêx o mẽ pa xwýnhjê nhõ pahihtu na. Tã pu pre htem pahtýx ri hkõt amnhĩ nhĩpêx pix o ri papa.

³ Mẽ pahpiitã tanhmã amnhĩ tomnuj to hprãm xà hkõt pix mã tanhmã amnhĩ nhĩpêx to. Nẽ mẽmoj punuj kukamã pajamaxpër nẽ ra hkõt ã amnhĩ tomnuj anẽ. ã na pu prem mnhĩ nhĩpêx anẽ nhũm Tĩrtũm ja hã mẽ pahpumu nhũm ja kãm mex kêt nẽ. Jakamã nhũm tee ri mẽ pakukamã hamaxpër nẽ hamaxpër o:

—Hêxta waa nê. Na htem ixkapêr kwým ri tanhmã amnhĩ tomnuj to rãhã ho pa. ã mẽ kot amnhĩ nhĩpêx anhÿr o mẽ pa xwÿnhjaja koja mẽ nhÿrmã ixri htĩr tũm nê mex nê pa ho pa hkêt nê. Ixkĩnhã mẽ kot amnhĩ tomnuj xwÿnh jakamã tanhmã kot mẽ amnhĩ to nê ixri htĩr tũm nê pa ho pa? Nà mẽ kot amnhĩ tomnuj mÿrapê koja mẽ nhÿrmã ma amnhĩ xà htÿx kamã hamak tũm xàta wÿr ma hapêx pa. Nà koja mẽ anê. Hêxta waa nê. Inhmã ma hwÿr mẽ pa prãm kêt tã ra ma hwÿr mẽ pa kaxyw.

Anhÿr o hamaxpêr.

⁴⁻⁵ Nê amnepêm kormã mẽ pahte amnhĩ tomnuj o papata ã te mẽ pahte amnhĩ xà htÿx kamã pajamak tũm xà hwÿr pryta ã mẽ papa pyræk. Nom Tĩrtũm kãm mẽ pajapê nê mẽ pakamã ukapĩrĩ jakamã na pre mẽ pahto mex rax nê. Nê akupÿm Kris o htĩrja ri te ra mẽ pahte amnhĩ xà htÿx kamã pajamak tũm xà hwÿr pryta nê mẽ pahto ujanãr pyræk o mẽ panhĩpêx. Mẽ pakamã ukapĩrĩ nê kãm mẽ pajapê ho ã mẽ panhĩpêx anê. Amarĩ ã mẽ panhĩpêx anê nê mẽ panê mẽ pahte amnhĩ tomnuj rênh pa. Jakamã kot puj mẽ pahte Kra hkôt amnhĩ xunhwÿr xwÿnhjaja nhÿrmã amnhĩ xà htÿx kamã mẽ hamak tũm xàta wÿr papa hkêt nê.

⁶ Ra Tĩrtũm akupÿm Jejus Kris o htĩr jakamã te ra Jejus kôt akupÿm mẽ pahpê hkwyjê ho mẽ pahĩr pyræk. Jakamã te ra õ krĩ kamã ãhkô hã mẽ pamex kumrêx nê pahkrĩ pyræk.

⁷ Mẽmo kaxyw na pre Tĩrtũm kãm mẽ pajapê hkôt ã mẽ pahwÿr Jejus Kris mẽnh nhũm mẽ panê htyk anê? Nà kãm mẽ pajapê htÿx ã mẽ pahte

pahprĩ hã amnhĩ tã omunh kaxyw na pre ã mẽ pahwỳr mẽnh anẽ. Tã kot puj mẽ nhỹrmã kaxkwa kamã hwỳr pøj nhũm mẽ pamã amnhĩ jarẽnh o:

—E mẽ amnẽ ixpumu. Inhmã mẽ ajapê htỳx jakamã na pa pre mẽ akamã ixukaprĩ xàj ma mẽ awỳr Ixkra Jejus Krisja mẽ nhũm amnhĩ grõnh kõt mẽ awỳr wrỳ nẽ mẽ anê ty. Inhmã mẽ ajapê htỳx jakamã na pa pre ã mẽ awỳr mẽnh nhũm mẽ anê htyk anẽ. Inhmã mẽ apê ixkrajê japê xàj na pa pre ã mẽ ato mex rax anẽ.

Anhỹr o mẽ pamã kapêr hãmri nẽ mẽ pahto mex rãhã ho pa.

⁸⁻⁹ Xà na pu prem pahpê hkra hprãm xàj amnhĩ krã hkõt mẽ papamjaja kãm tanhmã amnhĩ to mex to nẽ kãm:

—E kwa Tĩrtũm. Na pa ã amnhĩ to mex anẽ nẽ ã amnhĩ to mex anẽ. Jakamã kwa ja hã ixpumu nẽ ixto akra nà?

Anhỹr o na pu prem amnhĩ to kuwỳ? Nà na pu prem ã amnhĩ to hwỳr anhỹr kêt nẽ. Na pu prem amnhĩ kaxyw hkõt pajamaxpêr nẽ hkõt amnhĩ xunhwỳ nhũm ja pix ã mẽ pahpumunh kõt mẽ panê mẽ pahte amnhĩ tomnuj rê nẽ mẽ pahto hkra. Kãm mẽ pajapê nẽ mẽmoj to mẽ pakutã nojarêt rãhã ho pa jakamã na hte ã mẽ panhĩpêx mex anẽ. Jakamã na pu htem amnhĩ tã omu nẽ pajamaxpêr o:

—Nà na xep hte Tĩrtũmja mẽ pahte tanhmã amnhĩ nhĩpêx to ho papa hã mẽ pahpumunh kõt mẽ pahto hkra hkêt nẽ. Æm mẽ pahte amnhĩ kaxyw kãm pajamaxpêr ã mẽ pahpumunh kõt pix mã na hte mẽ pahto hkra. Anẽ.

¹⁰ Nē Tīrtūm tapxipix na hte tanhmã mẽ pahto pu mẽ amnhĩ to mex rãhã ho papa. Nom kormã kot mẽ pahto hkra hkêt ri na pu prem ã amnhĩ nhĩpêx anhỹr kêt nē. Tã Jejus Kris kôt amnhĩ xunhwý nhũm Tīrtūm ja hã mẽ pahpumu nē mẽ pamã mẽ pahte amnhĩ nhĩpêx nyw jagjê pu mẽ ý hã tãm amnhĩ nhĩpêx o ri papa. Amnepêm tanhmã kot mẽ pakukamã hamaxpêr to xà hkôt. No na hte tanhmã mẽ pahte amnhĩ krã hkôt amnhĩ nhĩpêx to hã mẽ pahpumunh kôt mẽ pahto hkra hkêt nē.

*Tīrtūm krajaja te kot axpên to htõ nē htõx pyràk
Karatas 3.28; Korosẽ 1.21-23*

¹¹ E mẽ apê Ijaew kêt xwýnhjaja. Na ka htem mẽ akatorxà nhõhy rũm ajapôj hãmri nē mẽ ixpê Ijaew pyrà nē amnhĩ my kwryt kà jakàr kêt nē. Jakamã na pre ixkwýjaja mẽ akurom amnhĩ jakàr ã amnhĩ to jarkrar o ri pa nē amnhĩ jarênh o:

—Ra mẽ ixte amnhĩ my kwryt kà jakàr ã mẽ ixpumunh kôt na hte Tīrtūm mẽ ixto hkra. Tã Ijaew kêt xwýnhjaja kot mẽ ixkĩnhã amnhĩ jakàr kêt jakamã mẽ kêp hkra hkêt. Nē mããnên mẽ kêp mẽ pahkwý hkêt.

Anhỹr o mẽ ajarênh o pa.

¹² ãm hãmri na prem mẽ apê mẽ ixkwý hkêt ã mẽ ajarê. Na pa prem mẽ akurom amnhĩ my kwryt kà jakà nē mẽ akurom Kris kamã ijamak o ri ixpa. Jakamã nhũm Tīrtūm kot mẽ ixto mex ã amnhĩ jarê pa mẽ mẽ apyrà nē tee ri amnhĩ kukamã ijamaxpêr o ri ixpa hkêt nē. Nē mẽ akurom amnhĩ kaxyw Tīrtūm mã ijamaxpêr. Nà ãm hãmri na prem mẽ apê mẽ ixkwý hkêt ã mẽ ajarê.

13 Te Tĩrtũm kàx ã ri mẽ apa pyràk tã ka mẽ arĩ ã amnhĩ nhĩpêx anhỹr kêt nẽ. Jejus Kris kot mẽ panê htyk nhũm mẽ ate hkôt amnhĩ xunhwỳr jakamã ra mẽ apê hkwỳy. Jao arĩ hkàx ã ri apa hkêt nẽ. Te mẽ ixpê Ijaew kwỳ pyrà nẽ hpãnhã kuri ra ri apa pyràk.

14 Jakamã na pu htem Kris kukwak ri ra axpẽn nhĩpêx nyw o axpẽn nhĩpêx o ri papa. Mẽ ixpê Ijaewjaja nẽ mẽ apê Ijaew kêt xwỳnhjaja na pu htem te ra ixkre tipxi kamã ri papa pyràk. Nom amnepêm na pu prem ã axpẽn nhĩpêx anhỹr kêt nẽ. Mẽ pahte amnhĩ nhĩpêx tũmja ahpỹnhã na pre. Na pu prem pamã axpẽn kurê nẽ axpẽn kàx ã ri papa. Nẽ nhỹri axpẽn pumu nẽ te pahte axpẽn pumunh kêt pyrà nẽ nhãm parĩt o ri mra. Tã nhũm Kris mẽ panê htyk o mẽ pahte amnhĩ tomnuj piitã hpãnhã amnhĩrer pa. Mẽ ixpê Ijaew nẽ mẽ apê Ijaew kêt xwỳnhjaja. Nẽ htyk o te ra kot mẽ pahte axpẽn nhõrkwỳ hwỳr axpẽn wỳr o papa pyràk. Jao mẽ pamã axpẽn kurê ho hapêx nẽ hpãnhã tãm axpẽn kaxyw mẽ paxunhwỳ pu mẽ hpãnhã axpẽn to mex rãhã ho ri papa.

15 Amnepêm Mojes kot Tĩrtũm nhỹ hã mẽ ixpê Ijaew mẽ ixte tanhmã amnhĩ nhĩpêx to ho ixpa hã karõja. Na pa prem mẽ apê Ijaew kêt xwỳnhjaja mẽ ate Tĩrtũm kôt amnhĩ nhĩpêx kêt ã mẽ apumu nẽ mẽ akamã inhgryk nẽ. Nẽ axpẽn mã mẽ ajarẽnh o:

—Nà mẽ pahkĩnhã mẽ kot Mojes kapêr kôt amnhĩ nhĩpêx kêt jakamã koja Tĩrtũm mẽ ho hkra hkêt nẽ.

Anhỹr tã nhũm Kris mẽ pahwỳr wrỳ nẽ mẽ pahpiitã mẽ panê htyk o mẽ pahte hkôt amnhĩ xunhwỳr ã mẽ pahpumunh kôt pix mã mẽ pahto Tĩrtũm kra. Jakamã pa mẽ axte mẽ ate Mojes kapêr

kôt amnhĩ nhĩpêx kêt ã mẽ apumunh kôt mẽ apê Tĩrtũm kra hkêt ã mẽ ajarênh kêt nê. Hãmri nê mẽ ixpê Ijaew nê mẽ apê Ijaew kêt xwỳnhjaja pu mẽ axte axpên kãm pagryk o ri papa hkêt nê. Ra te ixkre tipxi kamã mẽ pahte axpên kôt ri papa pyràk.

¹⁶ Kris na pre pĩ kahpa hã mẽ panê htyk o ã mẽ panhĩpêx anê nê mẽ pahte axpên kôt amnhĩ nhĩpêx o papa kaxyw mẽ paxunhwỳ. Nom Tĩrtũm jamaxpêr xà hkôt ã mẽ panhĩpêx anê. Jakamã na pu htem arĩ pamã axpên kurê ho papa hkêt nê.

¹⁷ Na pre Kris mẽ pahwỳr wrỳ nê ã mẽ panhĩpêx anê. Mẽ apê Ijaew kêt xwỳnhjaja mẽ ate kormã Tĩrtũm kapêr mar kêt xwỳnhjaja nê mãânên mẽ ixpê Ijaew mẽ ixte kapêr mar mex xwỳnhjaja nhũm pre akupỹm tãm mẽ pahte axpên kôt amnhĩ nhĩpêx o papa kaxyw mẽ paxunhwỳ.

¹⁸ Hãmri nhũm Tĩrtũm mẽ pahwỳr amnhĩ Karõ rê nhũm mẽ pahkarõ mã agjê. Kris kukwak ri pix mã mẽ pahwỳr kurê pu mẽ ý hã paxàmnhĩx ri kãm tanhmã amnhĩ jarênh to ho ri papa.

¹⁹ Hãmri nê te mẽ pahpê nhãm axpên kaxyw mẽ urojê pyrà nê axpên kàx ã ri papa hkêt nê.

Te mẽ pahpê Tĩrtũm nhõrkwỹ pyràk ã mẽ pajarênh Wam Korõt 3.16; Sikũn Korõt 6.16; Wam Pêtre 2.5

²⁰ Nê mẽ pahpê Jejus kwỳ jakamã te mẽ pahte ixkre tipxikamã ri papa pyràk. Nê te mẽ pahpê ixkre nhĩpêx mex pyràk. Nê Kris te kêp ixkre hkrax mã kuhê xà nê kỳxpê kãm nõi xà maatija pyràk. Nê mẽ kot Jejus nhỹ hã mẽ ahkre xwỳnhjaja nê mẽ kot Tĩrtũm nhỹ hã kapêr o ri mẽ pa xwỳnhjaja te mẽ kêp ixkre nhõkwa êja pyràk. Nê mẽ papajaja te mẽ pahpê ixkre nhĩmõk ã põja pyràk.

²¹ Ixkre mã kuhê xà nê kÿxpê kãm nõi xà maati kukwak ri pix mã na hte ôkwa ê nê hã pôja kÿxpê mex nê axpên tã harir. Ja pyrà nê ãm Kris kukwak ri pix mã na pu htem te ixkre tipxi kamã ri papa pyràk o axpên nhîpêx mex o ri papa. Te mẽ pahpê mẽ kot ixkre rax kumrêx nhîpêx o mõi nhũm muxre nê ãm xwÿnhhta pyràk.

²² Na htem amnhĩm ôrkwÿ nhîpêx nê hipêx pa nê hwÿr agjê nê kamã pa ho pa. Ja pyrà nê na hte Tĩrtũm Karõja mẽ pahpê hkrajê karõ mã agjê nê mẽ pakamã pa ho pa. Te mẽ pahpê Tĩrtũm nhõrkwÿ pyràk. Mẽ ixpê Ijaew nê mẽ apê Ijaew kêt xwÿnhjaja Tĩrtũm mã te mẽ pahpê ôrkwÿ pyràk.

3

Pawre kot Ijaew kêt xwÿnhjê mã mẽmoj to amnhĩrĩt ã harênh

Rõmãn 15.14-21; Korosê 1.24-29

¹ Tã te mẽ pahpê Tĩrtũm nhõrkwÿ pyràk jakamã na pa hte jar mẽ hagjênh xà kamã mẽ ato hwÿr rãhã ho ixkrĩ. Na pa pre hte ma mẽ apê Ijaew kêt xwÿnhjê hwÿr ixpa nê ixprĩ hã mẽ amã Jejus kapêr jarênh o ri mẽ akõt ixpa. Mÿrapê na prem ixpynê nê ijaxà pa arĩ jar ixkrĩ ho ixkrĩ. Nom arĩ amnhĩ kaxyw Tĩrtũm mã ijamaxpêr tÿx pê mẽ ato hwÿr rãhã ho ixkrĩ.

² Na pre kãm ijapê hã mẽ apê Ijaew kêt xwÿnhjê kaxyw ixãm. Ma ixte ri mẽ akõt ixpa nê mẽ amã kapêr jarênh o ri mẽ akõt ixpa kaxyw. Ra mẽ ate ja hã ijarênh mar mex.

³ Na pre mẽ pahto hpimràatã tanhmã mẽ pahto mex to hã inhmã amnhĩ to amnhĩrĩt pa pre omu. Mẽ kajaja nê mẽ pajaja. Pika piitã hkõt mẽ piitãã

tanhmã mẽ ho mex to. Na pre kormã kot mēhõ mã ja jarēnh kêt tâ inhmã ho amnhĩrīt pa pre omu. Tã kagà ja kamã kot paj mẽ amã hkwỳ ho grēre nē ho amnhĩrīt nē mẽ amã hã kagà ka mẽ ixpyrà nē kamã harē nē ama.

⁴ Jao aprĩ hã mar mex nē.

⁵ Amnepēm mẽ pahkêt ri mẽ pa xwỳnhjê mã Tĩrtũm kot ja ho amnhĩrīt kêt tâ nhũm Karõ mẽ ixkwỳjê kumrēx mã ho amnhĩrīt. ỹ hã kapēr o ri mẽ pa xwỳnh mẽ mẽ ixpê Jejus nhỹ hã mẽ ajahkre o mẽ ixpa xwỳnhjê kumrēx mã ho amnhĩrīt. Mẽ ixte kãm tanhmã amnhĩ nhĩpêx to ho ixpa xwỳnhjê mã ho amnhĩrīt pa prem omu.

⁶ Na pre mẽ inhmã tanhmã mẽ ato amnhĩrīt to pa prem ja hã mẽ apumu nē mẽ akukamã ijamaxpēr o:

—Nà ãm hãmri koja xep Ijaew kêt xwỳnhjaja mẽ ixpê Ijaew pyrà nē Tĩrtũm kapēr ma nē Jejus Kris kôt amnhĩ xunhwỳ nhũm Tĩrtũm ã mẽ kot amnhĩ nhĩpêx anhỹr ã mẽ omu nē mẽ ixpyrà nē mẽ ho hkra nē mẽ ho mex o pa. Anē.

⁷ Tã nhũm Tĩrtũmja mẽ awỳr inhmẽ. Ixte mẽ amã ja jarēnh o ri mẽ akôt ixpa nhũm tokyx mẽ ate mar kaxyw. Na pre ixto mex nē kãm hprãm xà hkôt mẽ akaxyw ixãm nē ixte ỹ hã kãm tanhmã amnhĩ nhĩpêx to ho ixpa kaxyw ixto ixihtỳx nē mẽ awỳr inhmẽ.

⁸ Tã mo kaxyw na pre mẽ akaxyw ixãm? Te ixte ja kaxyw inhmex kêt pyràk. Ixkwỳjaja ja kaxyw mex o kot ijakrenh tâ nhũm pre ixpumu nē tanhmã hamaxpēr to nē mẽ akaxyw ixãm nē mẽ awỳr inhmẽ. Ixte mẽ amã mẽmoj mex kumrēx jarēnh o ri mẽ akôt ixpa kaxyw. Na pre inhmã:

–Kêr ka ma Ijaew kêt xwÿnhjê hwÿr mō nē mē kām Jejus Kris kapêr jarēnh o ri mē hkôt apa. Nē mē kām: “Kot kaj mē Jejus Kris kôt amnhĩ xunhwÿ hāmri nē kukwak ri amex nē apa.” Anē.

⁹ Koja mē apê Ijaew kwÿjê pyrà nē amnhĩ kaxyw Ixkra Kris kôt hamaxpêr nē hkôt amnhĩ xunhwÿ pa hã mē omu nē mē ho ixkra. Kormã aa ixte mē kām ja hã amnhĩ to amnhĩrīt kêt tã pa akumrêx mã harê. E ma mē hkôt ri mē kām ã ijarēnh anhÿr o ri apa kê mē ijarēnh ma.

Anhÿr o mē pahto kator xwÿnh maatija inhmã kapêr.

¹⁰ Tã mēmo kaxyw na hte mē pahto hpimràatã mē pahto hkra? Nà kaxkwa kamã kapêr o mē wrÿk xwÿnh pytâr xwÿnhjaja nē mēkarōmnuti kot mē pahte amnhĩ nhĩpêx nyw o papa hã mē pah-pumunh kôt axpên mã tanhmã Tĩrtũm jarēnh to kaxyw. Nē harēnh o:

–Kokÿÿ. Tĩrtũm àhpumunh tÿx o àhpumunh tÿx jakamã na hte tanhmã mē hipêx to nhũm mē tãm amnhĩ nhĩpêx mex o pa. Nà Tĩrtũm àhpumunh o àhpumunh nē hihtÿx o hihtÿx. Anē.

Koja mē ate amnhĩ to mex o apa hã mē apumu nē ã axpên mã Tĩrtũm jarēnh anē.

¹¹ Amnepêm kormã mēmoj kêt ri na pre Tĩrtũm mē pakukamã mē pahtã tanhmã amnhĩ jarēnh to hāmri nē Jejus kukwak ri ã mē panhĩpêx anē. Jao mē piitã mē kām àhpumunh o àhpumunh ã amnhĩ to amnhĩrīt.

¹² Tã pu mē ra Jejus kukwak ri amnhĩ kamã pamã Tĩrtũm puma hkêt nē. Kām mē pajapê kênã kot pu kêt mē ri amnhĩ kamã pamã uma ho papa. Kot puj mē paxàmnhix ri kām amnhĩ jarēnh rãhã

ho ri papa. Te ra pahte hwÿr paxàpir nê pano ho omunh nê kãm pakapêr o pakuhê pyràk.

¹³ Jakamã kwa kêr ka mẽ kot mẽ atã tanhmã ixtomnuj to hã ijarênhja ma nê tee ri ixkukamã ajamaxpêr hkêt nê. Kwãr mẽ mãmri tanhmã inhîpêx to. ãm ixte mẽ amã amnhî jarênh ma nê axpên mã ijarênh o:

—Hêxta waa nê. Mãn Pawre kãm mẽ pajapê hã na pre amnhî grônh kôt mẽ pamex kaxyw mẽ pahwÿr mra nê mẽ pamã Tirtũm kapêr jarênh o pa. Mẽ kot ja hã tanhmã hipêx kati hto htã nhũm jam urer kêt nê. Anê.

Kris kãm mẽ pajapê kamã tanhmã mẽ panê amnhî nhîpêx to

Juãw 3.16; Wam Juãw 3.1

¹⁴ Nê na pa hte mẽ ato Mêpanhîpêêxà maati hwÿr kãm ixihitÿx o ixpa.

¹⁵ Kêp mẽ pahte hkôt amnhî xunhwÿr xwÿnhjê nhõ Pahi Maati mex kumrêx na. Kra hkwÿjaja ra kaxkwa kamã kuri htîr tũm nê pa ho pa nê arî pyka ja kamã mẽ pahpê hkwÿjaja kormã jar papa. Nom te mẽ pahpiitã mẽ pahte ixkre tipxi kamã Tirtũm kôt ri papa pyràk.

¹⁶ Jakamã na pa hte mẽ ato hwÿr o:

—Pa Tirtũm. Nà amex o amex. E ot pa Epes nhõ xwÿnhjê ho awÿr o ixkrî. Kwa kê Akarõ mẽ kãm axàhpumunh xà hkwÿ gõ kê mẽ akôt ri amnhî nhîpêx rãhã ho pa.

¹⁷ —Nê kê mẽ amnhî kaxyw Kris kôt hamaxpêr tÿx o pa. Te mẽmo pî hpàr jarê kot pika kaxwÿnh kãm pimành nê pika jamÿnh tÿxta pyràk. Nhũm kôk xàpêr tÿx tã tee kot kãm mẽnh prãmta pyràk. Kê mẽ

pĩ hpàr jarê kot pika jamỳnh pyrà nẽ kãm axpẽn kĩnh o pa. Jao mẽmoj to axpẽn kutã nojarêr rãhã ho pa.

¹⁸⁻¹⁹ —Nẽ kê krĩ piitã hkôt mẽ akrajê pyrà nẽ amnhĩ tã Kris kãm mẽ hapê htỳx o mẽ hapê htỳx ã amnhĩ pumu. Jao urak nẽ mẽ kãm axpẽn kĩnh tỳx o pa. Nẽ kê mẽ ate amnhĩ nhĩpêx pix o amnhĩ nhĩpêx rãhã ho pa. Nẽ ajamaxpêr pix o hamaxpêr rãhã ho pa. Jao te mẽmo pĩ hpàrta pyrà nẽ akôt hihtỳx nẽ. Anẽ.

²⁰ Kot puj mẽ ã amnhĩ to Tĩrtũm wỳr anẽ nhũm mẽ pama nẽ ra àhpumunh tỳx xà ho ã mẽ panhĩpêx anẽ. Ra kot mẽ pakamã pa ho pa kênã.

²¹ ã Tĩrtũm Jejus Kris kukwak ri mẽ pahpê hkrajê nhĩpêx anhỳr jakamã kwa pu mẽ pahpê hkra xwỳnhjaja kêr pu mẽ kãm mex o mex ã harênh rãhã ho papa. Nà kot puj mẽ ã kãm anhỳr o papa.

4

Te ixkre tipxi kamã axpẽn kôt ri mẽ papa pyrak Rômãn 15.5; Piripos 2.1-4; Korosê 3.12-17; Wam Pêtre 3.8

¹ Nẽ ra mẽ kot Kris ã ijaxàr nhũm ixkrĩ htã pa ã inhmã mẽ akĩnh xàj mẽ amã ixkapêr nẽ hã kagà anhỳr o ixkrĩ. Kwa kêr ka mẽ Tĩrtũm kot amnhĩ nhĩpêx kôt amnhĩ nhĩpêx mex rãhã ho ri apa. Ja kaxyw na pre amnhĩ kôt mẽ awỳ ka prem hkôt amnhĩ xunhwỳ.

² Nẽ kêr ka mẽ amã amnhĩ to rax o akwỳjê jakrenh prãm o ri apa hkêt nẽ. Nẽ mẽ agryk tokyx anhỳr kêt nẽ. ãm axpẽn kãm axukaprĩ pix o mãn ri axpẽn kôt apa. Kê mẽhõ tee tanhmã ri mẽ ato htã

ka mẽ kamã agryk tokyx anhÿr kêt nê. ãm mẽ amã ri axpên hkĩnh pix o mãn ri axpên kôt apa.

³ Ra Tĩrtũm Karõ kot mẽ pahkarõ mã gjêx par jakamã te mẽ pahte ixkre tipxi kamã axpên kôt ri mẽ papa pyræk. Jakamã kêr ka mẽ axpên to mex pix kukamã mãn kêt ajamaxpêr o ri axpên kôt apa. Nê tãm axpên nhĩpêx. Jao ajamakêtkati nê axàmnhĩx ri axpên kôt ri apa ho apa.

⁴ Te mẽ pahte ixkre tipxi kamã ri axpên kôt papa pyræk jakamã mẽ pahpiitã mẽ pahkarõ kamã Tĩrtũm Karõja hkrĩ ho hkrĩ. Jakamã kot puj mẽ nhÿrmã ma õ krĩ hwÿr api nê kamã mẽ pamex rãhã papa ho papa.

⁵ Nê mẽ panhõ Pahihtija ãm pixii. Na pu prem pahpiitã amnhĩ kaxyw hkôt pajamaxpêr jao ra mẽ pahpê hkraa. Tã mẽ pahpê Kris kwÿ hã amnhĩ to amnhĩrĩt kaxyw na prem Tĩrtũm mã mẽ pahkrã kumrã. ã mẽ panhĩpêx anhÿr o axpên pyræk o mẽ panhĩpêx o pa anê.

⁶ Nê Tĩrtũm haxwÿja ãm pixii. Kêp mẽ pahpiitã mẽ panhĩpêxà maati na. Na hte mẽ pahpê hkrajê mã àhpumunh xà hkwÿ gõ pu mẽ ÿ hã kãm tanhmã amnhĩ nhĩpêx to ho papa. Nhũm hte mẽ pahkarõ kamã pa ho pa. Jakamã te mẽ pahte ixkre tipxi kamã ri axpên kôt papa pyræk.

Kris kot ahpÿnhã tanhmã mẽ pahto mex to hã harênh

Rõmãn 12.3-8; Wam Korĩt 12.1-12; Wam Pêtre 4.10-11

⁷⁻⁸ Nê Tĩrtũm kapêr ã kagà htũm kot Kris jarênh kot:

Na pre mẽ kot kutã amnhĩ xunhwÿr xwÿnhjê pytår pa nê ma akupÿm kaxkwa hwÿr api.

Tã arĩ jar pika hkôt mẽ pahpê hkwỳjê mã tanhmã mẽ pahto paxihtỳx to ho pa.

Na hte Krisja tanhmã mẽ pahte ahpỳnhã kãm amnhĩ nhĩpêx to ho papa kaxyw tanhmã mẽ pahto paxàhpumunh to. Kãm hprãm xà hkôt.

⁹ Tĩrtũm kapêr ã kagà htũm kot akupỳm kaxkwa hwỳr àpir ã harênh. ãm tapxipix na pre ã pika hwỳr wrỳk nê akupỳm kaxkwa hwỳr àpir anê. Na pre ty nhũm mẽ haxà. Hãmri nhũm akupỳm htĩr nê kato nê ma akupỳm api. Tapxipix na pre ã amnhĩ nhĩpêx anê.

¹⁰ Tã akupỳm kaxkwa hwỳr àpir xwỳnhta na hte kaxkwa kamã nê pika hkôt amnhĩm mẽmoj piitã tanhmã ho ho hkrĩ.

¹¹ Na pre ahpỳnhã tanhmã mẽ pahto mex to. Ahpỳnhã mẽ pahte tanhmã kãm amnhĩ nhĩpêx to ho papa kaxyw na pre mẽ paxunhwỳ.

Nê mẽ pahkwỳjaja mẽ pahte krĩ piitã hwỳr pamarar nê ÿ hã hkrajê mã kapêr jarênh o papa kaxyw mẽ paxunhwỳ.

Nê mẽ pahkwỳjaja mẽ pahte krĩ pixi kamã Tĩrtũm nhỹ hã hkrajê jahkre ho ri mẽ hkôt papa kaxyw mẽ paxunhwỳ.

Nê mẽ pahkwỳjaja mẽ pahte pahprĩ hã mẽ piitã mẽ kãm tanhmã mẽ kot amnhĩ nhĩpêx to nê Jejus kôt amnhĩ xunhwỳr ã mẽ kãm harênh o papa kaxyw mẽ paxunhwỳ.

Nê mẽ pahkwỳjaja mẽ pahpê pastô kaxyw mẽ paxunhwỳ.

Nê mẽ pahkwỳjaja mẽ pahte mẽ kãm Tĩrtũm kapêr ã kagà jarênh o mẽ ahkre ho papa kaxyw mẽ paxunhwỳ.

¹² ã kot puj mẽ pahpiitã ahpỳnhã Kris mã tanhmã

amnhĩ nhĩpêx to ho ri papa anê. Kot puj mẽ ã mẽ hipêx anhỹr o ri papa nhũm mẽ pamar tỳx nê. Nê gaa nê mẽ pahpyrà nê Tĩrtũm mã amnhĩ nhĩpêx mex o pa. Pu mẽ pahpiitã hkôt amnhĩ nhĩpêx mex o papa.

¹³ Nê gaa nê mẽ pahpiitã mẽ pahpê Tĩrtũm kra hã Jejus kot amnhĩ nhĩpêx kôt omunh mex nê. Nê amnhĩ kaxyw hkôt pajamaxpêr tỳx nê. Jao te ra hkôt mẽ paxaptàr mex pyràk. Nê te kot amnhĩ nhĩpêx pyràk o amnhĩ nhĩpêx.

¹⁴ Mêhprĩrejaja na htem nhãm hamaxpêr nê nhãm hamaxpêr o pa. Te kôk xàpêr nê nhãm mẽmoj to mrar nê nhãm mẽmoj to mrar pyràk. Nom kêr pu mẽ ho mẽ uràk kêt nê. Âm Kris kôt pix mã pajamaxpêr tỳx o papa. Jakamã nhũm mẽ tee ri mẽ pahte hkwym ri tanhmã amnhĩ tomnuj to hprãm xàj tanhmã mẽ pahto kaprỳ. Nom kêr pu mẽ mẽ mar kêt nê. Âm pakatàt kôt mẽ aptàr kot amnhĩ nhĩpêx o amnhĩ nhĩpêx o papa. Jao Kris kôt axpên to paxihtỳx o papa.

¹⁵ Tãm axpên mã pakapêr nê pamã axpên kĩnh o axpên mã paxêx kêt nê. Kwa kêr pu mẽ ã amnhĩ nhĩpêx anhỹr o mãn papa. Jao te mẽ pahkrã Kris kot amnhĩ nhĩpêx pyràk o amnhĩ nhĩpêx mex o mỗ.

¹⁶ Nê mẽ panhĩ kamã tanhmã mẽ pakuteja piitã na hte mẽ pahkrã kamã mẽ pajamaxpêr xà hkôt axpên kôt ahpỹnhã tanhmã axpên to ajuta hto. Te ixkre pixi kamã mẽ pahte axpên kôt tanhmã axpên to ajuta hto ho ri papa pyràk.

Kris kôt mẽ pahte amnhĩ nhĩpêx nyw ã mẽ pamã karõ

Korosê 3.5-11; Wam Pêtre 4.7

¹⁷ E kot paj Pahihtĩ nhỹ hã mẽ amã mẽmoj jarẽ nẽ nê mẽ amã ixkapěr kãm ixihtỳx nẽ ka mẽ inhma. Nà kêt ka mẽ axte mẽ kệp Tĩrtũm kra hkêt xwỳnhjê kot amnhĩ nhĩpêx o amnhĩ nhĩpêx o ri apa hkêt nẽ. Na htem htỳx ri tanhmã hamaxpěr punuj to ho ri amnhĩ tomnuj o pa.

¹⁸ Jao Tĩrtũm mã hamaxpěr kêt nẽ pa. Kãm hamaxpěr prãm kêt kumrêx nẽ pa. Te mẽ kot omunh nẽ nhãm hkrã pyrãk o amnhĩ nhĩpêx. Rỳ te mẽhõ wa kot axpên kãm gryk kãm axpên nhĩpêx pyrãk o hipêx. Jao te kamàt kô kamã ri pa pyrã nẽ Tĩrtũm kot amnhĩ nhĩpêx pumunh kêt nẽ pa. Jakamã koja mẽ nhỹrmã kuri htĩr tũm nẽ pa hkêt nẽ.

¹⁹ Na htem tanhmã amnhĩ tomnuj to htã amnhĩ kamã hpijaàm kêt nẽ pa. Nẽ axpên kamã hpijaàm kêt rãhã ho pa. Âm amnhĩ pix kukamã hamaxpěr nẽ tanhmã amnhĩ tomnuj to ho ri pa.

²⁰⁻²¹ Nom Jejus Krisja ã kot amnhĩ nhĩpêx anhỹr kêt. Mẽ kurom tãm kot amnhĩ nhĩpêx mex o pa xwỳnh nẽ tãm kapěr o pa xwỳnh na. Na pa pre ma mẽ awỳr mỗ nẽ ixprĩ hã mẽ amã ja hã harẽ ka prem inhma nẽ inhmar tỳx nẽ.

²² Na pa pre mẽ amã:

—Kwa mẽ ri axte amnhĩ nhĩpêx tũm kôt amnhĩ nhĩpêx o ri apa hkêt nẽ. Ja na omnuj tỳx. Na ka prem ã amnhĩ nhĩpêx anẽ nẽ ajamaxpěr punuj pix o ri apa. Jao amnhĩ tomnuj rãhã nẽ. Tã kêt ka mẽ amnhĩ nê awry hã mẽnh pyrã nẽ axte ã amnhĩ tomnuj anhỹr o ri apa hkêt nẽ.

²³ —Nẽ kêt ka mẽ axte mẽ ajamaxpěr tũm nẽ mẽ ate amnhĩ nhĩpêx tũm kôt ri amnhĩ nhĩpêx kêt nẽ. Nẽ mẽ ajamaxpěr nyw nẽ mẽ ate amnhĩ nhĩpêx

nyw kôt pix mã ri amnhĩ nhĩpêx o ri apa. Te mẽ kot mẽ ê htũm kwrỳnh nẽ rẽnh nẽ hpãnhã nyw jagjêx nẽ ri hã pata pyrã nẽ ãm amnhĩ nhĩpêx nyw kôt pix mã amnhĩ nhĩpêx o ri apa.

²⁴ Mẽ ajamaxpêr nyw nẽ mẽ ate amnhĩ nhĩpêx nywja axtem na. Te Tĩrtũm jamaxpêr nẽ kot amnhĩ nhĩpêxta pyrãk. Jakamã kwa kêr ka mẽ kãm hprãm xà hkôt pix mã tanhmã amnhĩ nhĩpêx to ho ri apa. Jao kãm amnhĩ nhĩpêx mex o ri apa. Nẽ kapêr kôt ri amnhĩ nhĩpêx. Anẽ.

Na pa pre ã mẽ amã ixkapêr anẽ. Tã kêr ka mẽ arĩ ixkapêr kôt pix mã amnhĩ nhĩpêx.

²⁵ Mẽ pahpê Kris nhĩ jakamã te pahte ixkre htixi kamã axpẽn kôt amnhĩ nhĩpêx pyrãk jakamã kwa mẽ axte axpẽn mã mẽmoj to axêx kêt nẽ. Nẽ amarĩ axpẽn xô ri axpẽn mã mẽmoj to axêx kêt nẽ. ãm tãm axpẽn mã mẽmoj jarẽnh o ri apa.

²⁶ Nẽ kot kaj mẽ mẽmoj tã agryk japêr. Rỳ mẽhõ kamã agryk rỳ amarĩ agryk japêr. Tã kêr ka ho ajapêx tokyx anẽ agryk japjê hkêt nẽ. Kêr kê kormã kamàt kêt ri ka akupỹm tãm akrã nhũm ja amã mex nẽ.

²⁷ Nom kot ka mẽ arĩ kamã agryk o ri apa nhũm mẽkarõmnuti nhõ pahi Satanastija ja hã mẽ apumu nẽ te mẽ ate amnhĩ tomnujta ã mẽ apynênh pyrãk o mẽ anhĩpêx. Ka mẽ ra hkôt tanhmã amnhĩ tomnuj to. Ja pymaj kêr ka mẽ agryk japjê hkêt nẽ. Satanasti kãm hprãm xà hkôt ã amnhĩ nhĩpêx anhỹr kêt nẽ.

²⁸ Nẽ mẽ axàhkĩnh o mẽ apa xwỹnhjaja kêr ka mẽ axte mẽ kêp axàhkĩnh hkêt nẽ. Mẽmoj tã apê nẽ hpãnhã kàxpore jamỳ nẽ ho amnhĩm awjaprô. Nẽ

mě kêp amrakati xwỳnhjê mã mẽmoj japrôr o ri apa. Kêr ka mẽ ate amnhĩ nhĩpêx tũmta pãnhã ã amnhĩ nhĩpêx nyw o amnhĩ nhĩpêx anhỹr o ri apa.

²⁹ Nê kêr ka mẽ amã axpên kĩnh kamã tãm axpên mã akapêr o ri apa. Nê akapêr mã agêt kãm ri axpên mã akapêr kêt nê. ãm axpên mã akapêr mã aprĩ ho axpên mã akapêr. Nê mẽ amã axpên kĩnh nê mẽ amã axpên to mex pix prãm xaj tãm axpên mã ri akapêr o ri apa.

³⁰ Tĩrtũm na pre mẽ pahwỳr amnhĩ Karô rê nhũm mẽ pahpê hkra hã mẽ pahkarô mã agjê nê mẽ pakamã hkrĩ ho hkrĩ. Kojã mẽ pakamã hkrĩ ho hkrĩ rãhã nhũm nhỹrmã Tĩrtũm amnhĩ wỳr mẽ pahto api pu mẽ kuri pahtĩr tũm nê papa ho papa. Jakamã kwa kêr ka mẽ tanhmã amnhĩ tomnuj to ho amnhĩ kamã Tĩrtũm Karô mã hkaprĩ jagjênh kêt nê. Nê kãm hpijaàm jagjênh kêt nê. Kojã mẽ pahte amnhĩ tomnuj ã mẽ pahpumu nê mẽ pahkaga hkêr tã tee ri ja hã mẽ pahpumu nê hkaprĩ nê. Jakamã kêr pu mẽ ãm kãm hprãm xà hkôt pix mã tanhmã ri amnhĩ nhĩpêx to ho ri papa.

³¹ Nê kêr ka mẽ axte ri axàhkurê ho ri apa hkêr nê. Nê agryk kãm axpên mã tanhmã akapêr punuj to hkêr nê. Rỳ axpên japrỳ ho ri apa hkêr nê. Nê atỳx ri axpên tã apêr o apikênh kêt nê. Nê ri axpên tã mẽ kãm axàmnhênh kêt nê.

³² Kêr mẽ ãm axpên to mex pix nê axpên kãm axukaprĩ ho ri apa. Nhũm mẽhõ tanhmã mẽ ato ka mẽ ãm amnhĩ tã omu nê tanhmã ho hkêr nê tanhmã kot atoja ho ajamakêtkati kurê kumrêx. Tĩrtũm na pre Kris kukwak ri mẽ pahte amnhĩ tomnuj grành pa nê axte kãm hamaxpêr kêt nê. Tã kêr ka mẽ uràk nê mẽhõ kot tanhmã atomnuj tota

tokyx ho ajamakêtkati nê axte kãm ajamexpêr kêt nê.

5

¹ Nê koja mēhō kãm hkra japê nhũm amnhĩ tã omu nê hkĩnh nê. Hãmri nê nhỹrmã hkra nê amnhĩ pyrã nê kãm hapê nê. Ja pyrã nê Tĩrtũm kãm mē pahpê hkwỳjê japê jakamã kêr pu mē amnhĩ pyrã nê pamã pahkwỳjê hkĩnh tỳx o papa.

² Kris haxwỳja kãm mē pajapê jakamã na pre htyk o mē panê mē pahte amnhĩ tomnuj pãnhã amnhĩrer pa. Kêp Tĩrtũm Kra htã amnhĩ mex pix kukamã hamaxpêr kêt nê ã mē panê amnhĩ nhĩpêx anê. Tã ã kãm mē pajapê anhỹr jakamã nhũm Tĩrtũm ja hã omu nhũm ja kãm mex nê. Te ho mē hkuxwa xà mex kuxwa pyrãk. Jakamã kêr pu mē amnhĩ tã omu nê uràk nê pamã axpên kĩnh o axpên to mex o mãn ri papa.

Mê pahte amnhĩ tomnuj kaga hã kot mē pamã karō

Sikũn Korĩt 6.14-7.1; Korosê 3.16-17; Wam Juãw 1.5-10, 2.15

³ Nê mē pahpê Tĩrtũm kra jakamã kêr pu mē pahprō pix tãnopxar o ri papa nê nhãm mēnijê hō kamã pahpijaàm kêt o ri papa hkêt nê.

Nê kêr pu mē amnhĩ pix kukamã pajamexpêr kêt nê. Âm ja ho anhỹr hkêt kumrêx. Mē pahpê Tĩrtũm kra kênã kot pu kêt axtem nê ã amnhĩ nhĩpêx anhỹr o ri papa. Tĩrtũm krajaja na htem ã amnhĩ nhĩpêx anhỹr kêt nê.

⁴ Nê mããnên mē pakapêrja. Kêr pu mē ri tanhmã axpên mã pakapêr punuj to hkêt nê. Nê ri axpên japrỳ hkêt nê. Nê amnhĩ krã hkôt pahtỳx ri

tanhmã pakapêr to hkêt nê. ãm tãm axpên mã pakapêr mex nê axpên mã Tirtũm mex o mex ã harênh o ri papa.

⁵ Nê Tirtũm kapêr kôt amnhĩ nhĩpêx kêt xwýnhjaja nê axpên kãm mẽ hpijaàm kêt xwýnhjaja nê amnhĩ pix kukamã mẽ hamaxpêr o pa xwýnhjaja. ã mẽ kot amnhĩ nhĩpêx anhỹr xwýnhjaja kêp Tirtũm mẽ Kris wa hkra hkêt. Na htem ã amnhĩ nhĩpêx anhỹrja gryk ã wa kãm hamaxpêr kêt nê.

⁶ Nê koja nhỹrmã mēhō mẽ awýr mō nê mẽ ate tanhmã amnhĩ tomnuj to prãm xàj hêx rom amã kapêr nê mẽ amã:

—Kwa mon ka hte mẽ ixpyrà nê ã amnhĩ nhĩpêx anhỹr kêt nê? Ja mex kênã. Anê.

Koja ã mẽ amã kapêr anê ka mẽ ama nê ãm ama. ã mẽ kot amnhĩ nhĩpêx anhỹr xwýnhjaja koja Tirtũm nhỹrmã ja hã mẽ homnuj tỳx kumrêx.

⁷ Jakamã kwa kêr ka mẽ ate ho mẽ kot amnhĩ nhĩpêx pyræk pymaj mẽ hkôt ri apa hkêt nê. Kwarĩ ho kwarĩ.

Mê pahte amnhĩ nhĩpêx nyw jarênh

Juãw 1.4, 3.19, 8.12, 12.35; Rõmãn 13.12; Wam Tesarõn 5.5; Wam Juãw 1.5

⁸ Amnepêm kormã mẽ ate Tirtũm kôt amnhĩ xunhwýr kêt ri na ka prem te kamàt kô kamã ri apa pyrà nê atỳx ri tanhmã amnhĩ tomnuj to ho ri apa. Tã ra Jesus kôt amnhĩ xunhwý hãmri nê te hirã kamã mẽ apa xwýnh pyræk. Jakamã kwa kêr ka mẽ hpãnhã Tirtũm kãm hprãm xà hkôt pix mã mãn ri amnhĩ nhĩpêx o apa. Ra mẽ apê hirã kamã mẽ apa xwýnh kênã.

⁹ Kot kaj mẽ ã amnhĩ nhĩpêx anê nê tãm amnhĩ nhĩpêx mex nê tãm akapêr o apa.

¹⁰ Jao Tĩrtũm kãm hprãm xà hkôt pix mã amnhĩ nhĩpêx o ri apa

¹¹⁻¹² nê te kamàt kô kamã ri mẽ pa xwỳnhjaja kot amnhĩ nhĩpêx pyràk o amnhĩ nhĩpêx kêt nê. Æ mẽ kot amnhĩ nhĩpêx anhỹr xwỳnhjaja na htem hpimxur pê tanhmã amnhĩ tomnuj tỳx to ho pa. Nom kot paj ixprĩ hã mẽ amã tanhmã mẽ kot amnhĩ tomnuj to hã mẽ harênh kêt nê. Kot pa mẽ amã harê nê xpijaàm tỳx nê. Ixte harênh mã xwỳnhja omnuju. Tã kêr ka mẽ uràk nê ã amnhĩ nhĩpêx anhỹr kêt nê. Æm mẽ noo mã tãm ri amnhĩ nhĩpêx o ri apa.

¹³ Mẽ kot ja hã mẽ apumunh nê tee ri tanhmã kot amnhĩ tomnuj to hkukamã hamaxpêr kaxyw. Jao amnhĩ tomnuj kaga japêr.

¹⁴ Te mẽ kot kanê hpôk rax kãm mẽmoj piitã omunh mexta pyràk. Tĩrtũm kapêr ã kagà htũm kot ja jarênh kot:

Mẽ amã Tĩrtũm prãm kêt xwỳnhjaja te ra mẽ atyk nê mẽ anhĩkwỹ pyràk.

Nê te kamàt kô kamã mẽ anhôt nê mẽ anhĩkwỹ pyràk.

Jakamã kwa te mẽ akrã hapôx nê kànhmã mẽ akrĩ pyràk o amnhĩ nhĩpêx nê Tĩrtũm kôt amnhĩ xunhwỳ.

Kê Kris tanhmã mẽ akrã hto ka mẽ te myt kato nhũm mẽ ate arĩgro hã ri apa pyràk o amnhĩ nhĩpêx. Anê.

Tĩrtũm krajaja kot tanhmã amnhĩ nhĩpêx to hã mẽ kãm karõ

Korosẽ 4.5; Sikũn Ximotre 4.2

¹⁵ Nẽ kwa kêr ka mẽ amnhĩ pumunh mex o ri apa. Nẽ mẽ ri htỳx ri mẽ kot amnhĩ nhĩpêx xwỳnhjê hkõt amnhĩ nhĩpêx kêt nẽ. Nẽ ãm amnhĩ to mex pix o ri apa.

¹⁶ Na htem ra Kris ã mẽ pahtomnuj o pa pu mẽ pamex kêt nẽ ri papa. Tã nom kêr pu mẽ apkati mẽ arĩ Tĩrtũm mã tanhmã amnhĩ nhĩpêx to ho papa mã panhũrer kêt nẽ.

¹⁷ Nẽ ãm Tĩrtũm pix mã amnhĩ jarẽnh o ri papa nẽ kãm:

—Pa Tĩrtũm. Inhmã akõt pix mã amnhĩ nhĩpêx prãm jakamã kwa ixte amã mẽmoj to anhỹr kaxyw ixkrãm ijamaxpêr mex jagjê nẽ ho amnhĩrit mex pa tanhmã amã amnhĩ nhĩpêx to ho ri ixpa.

Anhỹr o amnhĩ to kuwỳ. Nom kêr pu mẽ pahtỳx ri pajamaxpêr kõt tanhmã kãm amnhĩ nhĩpêx to hkêt nẽ.

¹⁸ Nẽ kêr pu mẽ ri pahpipãnh o papa hkêt nẽ. Kwarĩ ho kwarĩ. Kot puj mẽ ã amnhĩ nhĩpêx anẽ nẽ te kagõxỳhti kot amnhĩ tã mẽ pahkaxpre pyræk o mẽ panhĩpêx pu mẽ tee ri pamã hkaga hprãm kaprỳ. Te kot amnhĩm mẽ pahto àrĩk pyræk o mẽ panhĩpêx nhũm ja mex kêt nẽ. Na htem pipãnh kãm hamaxpêr mex kêt nẽ ãm htỳx ri tanhmã amnhĩ nhĩpêx to ho pa. Tã kêr pu mẽ ã amnhĩ nhĩpêx anhỹr hkêt nẽ ãm Tĩrtũm Karõ pix hkõt mãn ri amnhĩ nhĩpêx o ri papa.

¹⁹ Nẽ kêr pu mẽ axpẽn wỳr akuprõ nẽ pahkĩnh kãm Tĩrtũm mã mex o mex ã harẽnh pê ho pagrer o pahkrĩ.

20 Nē mẽ pamex nē ri papa rỳ pahpunuj nē ri papa htã arĩ kãm mex o mex ã harēnh rãhã ho ri papa. Kêp Měpanhĩpêêxà maati jakamã mẽ pahpê Pahihti Jejus Kris kwỳ hã pu mẽ kãm mex ã harēnh rãhã ho papa nē aa ho pajamakêtkati hkêt nē.

21 Nē kêr ka mẽ Kris ã apijaàm rãhã o ri apa. Jao axpẽn kôt ajamxpêr nē axpẽn kôt ri amnhĩ nhĩpêx mex o ri apa.

Tanhmã mẽ hprõ nē mẽ mjên kot axpẽn nhĩpêx to hã mẽ kãm karõ

Wam Korõt 11.3; Korosẽ 3.18-19; Wam Pêtre 3.1-7

22 Nē kêr ka mẽ anijaja mẽ amjên ã apijaàm o ri apa. Nē mẽ hamaxpêr mex ã mẽ omu nē mẽ hkôt ri amnhĩ nhĩpêx o ri apa. Te mẽ ate Pahihti Kris kapêr kôt amnhĩ nhĩpêx o ri apata pyræk.

23 Kris kêp mẽ pakamã ukaprĩ xwỳnh nē kêp mẽ papytår xwỳnh jakamã te kêp mẽ pahpiitã mẽ pahkrã pyræk. Nē mẽ papajaja te mẽ pahpê ã pyræk. Jakamã na pu htem pahpê ãja te mẽ pahkrã kot tanhmã hamaxpêr to xà hkôt amnhĩ nhĩpêx o papaja pyræk. Ja pyrà nē kêr ka mẽ anijaja mẽ amjên jamaxpêr mex ã mẽ omu nē mẽ hkôt amnhĩ nhĩpêx mex nē.

24 Mẽ pahpê Kris kwỳ jakamã na pu htem hkôt amnhĩ nhĩpêx mex o ri papa. Ja pyrà nē kêr ka mẽ amjên kôt amnhĩ nhĩpêx mex o ri apa.

25 Nē mẽ amyjaja. Kêr ka mẽ amã aprõ hã ma ho ri apa. Te ho Kris kot mẽ pahtã ma ho pata pyræk. Na pre kãm mẽ pajapê xaj amnhĩ grõnh kôt mẽ pahwỳr wrỳ nē mẽ panê ty. Tã kêr ka mẽ uræk nē ã amã aprõ hã ma ho apa anẽ.

26 Na pre Kris kām mẽ pajapê xàj mẽ pahte amnhĩ tomnuj pê mẽ pahpytà. Te mēhõ my kām mēhõ ni hkĩnh nē mẽmoj punuj pê utàr nē ho hprõta pyràk. Nhũm te mẽ kot axpẽn mã wa rer kaxyw nhũm nija ma gôx mã htēm nē wỳr nē amnhĩ to mex nhũm mẽ kot axpẽn kaxyw wa ho mexta pyràk. Hāmri nē te ra axpẽn mã wa rer nhũm wa kot axpẽn kôt pa ho pata pyràk.

Ja pyrà nē na pre Jejus kām mẽ pajapê nē kām amnhĩ kuri mẽ papa ho mẽ papa hprãm xàj mẽ pahwỳr wrỳ nē mẽ pahte amnhĩ tomnuj pê mẽ pahpytà nē mẽ pamã Tĩrtũm kapěr jarēnh o pa. Tã mẽ pahpê hkrajaja na pu htem kapěr ma nē hkôt amnhĩ nhĩpêx o papa ho amnhĩ tomnuj kaga. Te gôx kām mẽ paxwỳr nē mẽ pahte amnhĩ nē amnhĩ grã htyk kuhõnh par pyràk. Jao Tĩrtũm kapěr kôt pix mã amnhĩ nhĩpêx o ri papa. Te ra paxwỳr nē amnhĩ nē tanhmã mẽ pahte amnhĩ tomnuj to grành par pyràk. Nē te mjèn mã xwỳnh wỳr nē amnhĩ to mex pyràk.

27 ã mẽ pahte amnhĩ nhĩpêx anhỹr jakamã te mẽ pamex nē ri papa pyràk. Hāmri nhũm Krisja ja hã mẽ pahpumu nē kām mẽ pajapê htỳx nē. Jakamã koja nhỹrmã akupỹn wrỳ nē mã akupỹm amnhĩ kôt mẽ pahto api pu mẽ kuri pa htĩr tũm nē papa ho papa.

28 Nē xà mẽ amyjaja mẽ amã amnhĩ japêê? Nà mẽ amã amnhĩ japê ho na ka htem amã amnhĩ tã ma ho apa. Tã kēr ka mẽ aprõ nhĩpêx o te ka amã amnhĩ tã mata pyràk. Jao tãm mẽ hipêx o ri apa. Te war apixire nē war apa pyràk o wa axpẽn nhĩpêx. Kot kaj mẽ tanhmã hipêx to nē te ate amnhĩ nhĩ tanhmã hipêx to pyràk.

29-30 Na htem amnhĩ nhĩ ho mex pix o pa nẽ kamã gryk kêt nẽ. Nẽ kãm prãm nẽ apku. Nẽ kãm kôr nẽ ixkõ. Nẽ nhỹhỹnh à nẽ amnhĩ kane. Na pu htem ã amnhĩ to mex o ri papa anẽ. Ja pyrã nẽ te mẽ pahpê Kris nhĩ pyrãk jakamã na hte mẽ pahto mex o pa. Te mẽ pamã mẽ papa mẽ pahte amnhĩ nhĩ hã mata pyrãk.

31 Tĩrtũm kapêr ã kagã htũm kot ja jarẽnh kot: Koja mẽmyjê hõ hprõ kaxyw hãmri nẽ hipêêxã nẽ katorxã wa õrkwỹ kaga nẽ ãm hprõ kôt pix mã hpãnhã ri pa ho pa. Te wa tipxi nẽ ri pa pyrãk o wa axpẽn nhĩpêx o pa. Anẽ.

32 Na pre Tĩrtũm ã ja jarẽnh anẽ. Kapêrja mex tã amnepê mã mẽ pa xwỹnhjaja na prem hprĩ hã mar tỹx kêt nẽ. Na prem htỹx mẽ mjên kot tanhmã mẽ hprõ nhĩpêx to pix ã hkamnhĩx no ãm ja pix kêt. Mããnẽn te mẽ pahpê Kris nhĩ pyrã nẽ tãm mẽ pahte amnhĩ nhĩpêx nẽ axpẽn nhĩpêx o papa hã ã mẽ pajarẽnh kot anhỹr. Te ixkre tipxi kamã mẽ pahte Kris kôt mẽ papa pyrãk o ã mẽ pajarẽnh anẽ.

33 Jakamã kwa kêr ka mẽ amyjaja mẽ amã mẽ aprõ japê ho ri apa. Te ka amã amnhĩ tã ma pyrãk o mẽ hipêx. Jao tãm mẽ hipêx. Nẽ mẽ anijaja kêr ka mẽ ajaxwỹja mẽ amjên ã apijaãm o ri apa.

6

Mẽ hkrajaja kot tanhmã hipêêxã nẽ katorxã nhĩpêx to hã mẽ kãm karõ

Korosẽ 3.20-21

¹ Nẽ mẽ apê mẽ hkrajaja kêr ka mẽ anhĩpêêxã nẽ mẽ akatorxã wa kapêr ma nẽ hã ano htỹx nẽ wa hkôt ri amnhĩ nhĩpêx rãhã ho ri apa. Mẽ amã Pahihti Kris kôt amnhĩ nhĩpêx prãm xàj ã amnhĩ

nhĩpêx anhÿr o ri apa. Kot kaj mẽ ã amnhĩ nhĩpêx anhÿrja o amnhĩ nhĩpêx mex o ri apa.

²⁻³ Tĩrtũm kapêr ã kagà htũm kot ja jarênh kot: Kêr ka mẽ anhĩpêxà nê mẽ akatorxà wa kapêr ma nê wa hkôt ri amnhĩ nhĩpêx. Kot kaj mẽ ã amnhĩ nhĩpêx anê nê amex nê kritpêm atĩr nê ri apa ry nê.

Anhÿr jakamã kot kaj mẽ amã kritpêm atĩr nê ri apa hprãm hã kêr ka mẽ ã amnhĩ nhĩpêx anhÿr o ri apa. Kormã mẽ aprĩre htã ã amnhĩ nhĩpêx anê. E kêr ka mẽ ã mẽ anhĩpêxà nê mẽ akatorxà nhĩpêx anhÿr o ri apa.

⁴ Nê mẽ apê mẽ hipêxà nê mẽ katorxà kêr ka mẽ akrajê gryk kaxyw mẽ kãm apêr o apikênh hkêt nê. Tãm mẽ kãm akapêr nê Pahihti Jejus kapêr o mẽ ahkre ho ri apa. E kêr ka mẽ ã akrajê nhĩpêx anhÿr o ri apa.

Mẽ pahte mẽ panhõ patrãw kapêr kôt amnhĩ nhĩpêx ã mẽ pamã karõ

Korosẽ 3.22-4.1; Wam Ximotre 6.1-2; Xitre 2.9-10; Wam Pêtre 2.18-25

⁵ Nê mẽ ate mẽ kãm mẽ axapênh o mẽ apa xwÿnhjaja kêr ka mẽ anhõ patrãw kapêr ma nê hkôt amnhĩ nhĩpêx mex o ri apa. Te mẽ ate Kris kapêr mar nê hkôt amnhĩ nhĩpêx pyrak. Jao mẽ hã apijaam rãhã nê.

⁶ Nom kêr ka mẽ ãm mẽ noo mã pix mã ri mẽ kãm axapênh mex kêt nê. Mããnên mẽ wa kre kamã mẽ kãm axapênh mex rãhã nê. Ja na Tĩrtũm kãm hprãm. Mẽ apê Tĩrtũm Kra Kris mã tanhmã amnhĩ nhĩpêx to ho apa xwÿnh jakamã kêr ka mẽ anhõ patrãw mã axapênh mex o ri apa.

⁷ Nē mẽ akĩnh kãm mẽ kãm axàpênh mex nē. Te mẽ ate Pahihti mã akĩnh kãm tanhmã kãm amnhĩ nhĩpêx to pyrà nē mẽ kãm tãm amnhĩ nhĩpêx pē axàpênh mex o ri apa.

⁸ Kot puj mẽ amnhĩ kaxyw Tirtũm mã pajamaxpēr pē pahkĩnh kãm tãm amnhĩ nhĩpêx o ri papa nhũm Pahihti ja hã mẽ pahpumu nē nhỹrmã ja hã mẽ pahto mex rax nē. Mẽ pahpê hkrajē piitãã. Mẽ pahte mẽ kãm paxàpênh xwýnhjaja nē amnhĩ mã mẽ paxàpênh xwýnhjaja nhũm nhỹrmã mẽ pahpiitã mẽ pahte tãm amnhĩ nhĩpêx xwýnhjê ho mex rax nē.

Mẽõ patrãwjaja kot tanhmã kãm mẽ àpênh xwýnhjê nhĩpêx to

Korosē 4.1

⁹ Nē mẽ apê mẽ õ patrãwjaja kēr ka mẽ amã mẽ àpênh xwýnhjê ho mex nē mẽ àpênh ã mẽ kãm axàkêr o ri apa hkêt nē. Tãm mẽ hipêx. Kaxkwa kamã mẽ panhõ Pahi Maatija mããnēn kēp mẽ õ Pahi Maati jakamã ã mẽ hipêx mex anhỹr o apa. Tãm na kãm mẽ pahpiitã mẽ pajapê ho axpēn pyræk. E kēr ka mẽ ã mẽ hipêx anhỹr o ri apa.

Tanhmã mẽ pahte Satanasti kutã amnhĩ to htỳx to hã mẽ pamã karõ

Rõmãn 16.20; Sikũn Korõt 10.3-5; Wam Tesarõn 5.8-11; Xiakre 4.7; Wam Pêtre 5.8-11

¹⁰ E kot paj hpãnhã tanhmã mẽ pahte mẽkarõmnuti nhõ pahi Satanasti kutã amnhĩ to htỳx to jarē ka mẽ inhma. Kēr ka mẽ Pahihti nhỹ hã kutã amnhĩ to htỳx rãhã nē apa. Ate tanhmã amnhĩ tomnuj to hprãm xàj tanhmã kot ato htã ka Tirtũm xihtỳx o anhõpinh xà kaxwýnh kãm

kutã amnhĩ to htỳx nẽ. Rỳ koja ate mẽmoj mex o anhỹr nẽ tanhmã ato ka mẽ amnhĩ tã hamaxpẽr ã omu nẽ ãm omu nẽ arĩ Tĩrtũm xihtỳx nhỹ hã tãm ajamaxpẽr mex rãhã ho ri apa.

11 Na hte p̄olistijaja pijapu kaxyw hãmri nẽ amnhĩ nẽ kàx o mẽ ê jagjê nhũm mẽ tee ri kãm mẽ hkamnhwỳr prãm hkapyrỳ. Tã ja pyrà nẽ koja Satanasti mẽ ate kapẽr kôt tanhmã amnhĩ nhĩpêx to hprãm xàj tanhmã mẽ ato ka mẽ amnhĩ tã hamaxpẽr ã omu hãmri nẽ Tĩrtũm xihtỳx nhỹ hã kutã amnhĩ to htỳx nẽ. Jao mẽ ate amnhĩ nhĩpêx nyw pix o amnhĩ nhĩpêx nẽ mẽ ajamaxpẽr nyw pix o ajamaxpẽr. Kot kaj mẽ ã amnhĩ nhĩpêx anẽ nhũm Satanasti tee ri tanhmã kãm mẽ ato hprãm hkapyrỳ.

12 Mẽ pahpê Tĩrtũm kra jakamã mẽ kot mẽ pakutã amnhĩ xunhwỳr xwỳnh maatiijaja axtem na mẽ. Mẽ kệp mẽkarõmnuti jakamã mẽ pahkĩnhã mẽ ĩ hkêt. ãm mẽ hkarõ kaxkrit pix na mẽ. Na htem kôk kôt tanhmã amnhĩ tomnuj tỳx to ho pa. Nẽ mẽ hihtỳx. Na htem arĩ jar pika ja kamã mẽ kệp Tĩrtũm kra hkêt xwỳnhjê ho amnhĩptà nhũm htem mẽ hkôt ri htỳx tanhmã ri amnhĩ tomnuj tỳx to ho pa. Nom amnhĩ tã mẽ omunh kêt nẽ.

13 Jakamã kwa kêr ka mẽ Tĩrtũm kot mẽ akarõ mã amnhĩ Karõ jagjênh xwỳnhnta kôt pix mã amnhĩ nhĩpêx o apa. Jao mẽ ate amnhĩ nhĩpêx nyw kôt pix mã mãn ri mẽ amnhĩ nhĩpêx. Kêr kê mẽkarõmnuti tee ri kãm tanhmã mẽ ato hprãm kaprỳ ka mẽ arĩ Tĩrtũm Karõ xihtỳx nhỹ hã kutã amnhĩ to htỳx rãhã ho apa.

14 Jakamã kwa kêr ka mẽ axkãm ajamak rom nẽ te ho sôrdat kot pijapu kaxyw ê jagjênh pyræk o

amnhĩ nhĩpêx. Na htem amnhĩ nê môx kà ho mẽ ê jagjê nê mẽ hpre xà ho amnhĩ pre hpa. Nê hipy kàx o mẽ hinô kà jagjê. Hãmri nê rĩ kormã ma mẽ kãm mẽ hkurê xwýnhjê kutã mra nê axpu. No mẽ kajaja kêr ka mẽ kurom amnhĩ krãm Tĩrtũm kapêr jaxàr tỳx nê hkôt pix mã ri ajamaxpêr rãhã ho ri apa. Nê hkôt ri amnhĩ nhĩpêx mex nẽ. Jao te sôrdat pijapu kaxyw kot amnhĩ nhĩpêxta pyræk.

¹⁵ Na hte sôrdatjaja hpar kà jagjê nê aa hopôx kêt nẽ. ãm rãhã gôr nê hikwỹ. Jao ra mẽ kutã pijapu kaxyw amnhĩ grônh rãhã gôr nê hikwỹ. Tã kêr ka mẽ ma mẽ kãm Jejus kot tanhmã mẽ panê amnhĩ nhĩpêx to hã harênh o apa kaxyw nê sôrdat pyrã nê amnhĩ grônh kôt ma mẽ hwýr apa nê amnhĩ kamã akahak kêt nẽ.

¹⁶ Nê sôrdatjaja na htem amnhĩ nê amnàr xà hã kàx po jamý nê ho kuhê nhũm mẽ tee ri kãm mẽ hkamnhwýr prãm kaprý. Ja pyrã nê koja Satanasti tanhmã mẽ ato ka mẽ Tĩrtũm kêp mẽ anhô pahi hã hihtỳx o kot Satanasti jakrenhja mã ajamaxpêr kurê kumrêx nê ãm hkôt pix mã amnhĩ nhĩpêx. Na hte Satanasti te kot mẽ pahwýr krur rênh pyræk o mẽ panhĩpêx. Jao xatã mẽ pahte Tĩrtũm kaga hprãm xàj tanhmã mẽ pahto. Nê mẽ pahte Tĩrtũm mã tanhmã amnhĩ nhĩpêx to pymaj xatã tanhmã mẽ pahto kaprý. Pu mẽ amnhĩ tã omu hãmri nê Tĩrtũm Karô xihtỳx nhỹ hã Tĩrtũm kôt pix mã amnhĩ nhĩpêx.

¹⁷ Nê na hte sôrdatjaja kàx o mẽ hkrãjapap jagjê nê pijapu kaxyw mẽ kutã mra nhũm mẽ tee ri mẽ hkrã jayr prãm kaprý. Ja pyrã nê kêr ka mẽ amnhĩ kaxyw Tĩrtũm kôt pix mã ajamaxpêr rãhã ho ri apa. Nê ra kot mẽ ato hkra mã ajamaxpêr rãhã nẽ.

Kê Satanasti tee ri kãm mẽ akrã kamã mẽ amã mẽ ajamaxpêr punuj jagjênh prãm hkaprÿ.

Nê sôrdatjaja na htem mẽ kutã wapo jamÿ nê ho kuhê. Nom mẽ papajaja mẽ panhõ wapoja na axtem kêp Tĩrtũm kapêr. Na hte Tĩrtũm Karõ mẽ pahkrã kamã kapêr o amnhĩrĩt pu htem pix mã pajamaxpêr o papa nhũm Satanasti tee ri kãm mẽ pahkrãm mẽ pajamaxpêr punuj jagjênh prãm kaprÿ. Te mẽ papijapu nhũm mẽ pahte amnhĩ nê ho pakrihkrit pyrãk o hipêx.

¹⁸ ã Satanasti pê mẽ pahte amnhĩ nê amnhĩ nhĩpêx kot anhÿr. Jakamã kêr pu mẽ amnhĩ to Tĩrtũm pix wÿr o ri papa kê Satanasti kutã mẽ pahto paxihtÿx pu mẽ hkôt tanhmã amnhĩ tomnuj to hkêt nê.

Nê kêr pu mẽ mẽmoj to anhÿr kaxyw nê ra Tĩrtũm Karõ nhÿ hã amnhĩ to Tĩrtũm wÿ. Nê kãm amnhĩ jarênh rãhã ho papa nê aa ja ho pajamakêtkati hkêt nê. Nê Tĩrtũm krajê piitã mẽ ho hwÿr rãhã ho ri papa.

¹⁹ Nê kwa kêr ka mẽ mããnên ixto Tĩrtũm wÿr rãhã nê. Kot tanhmã ixto nhũm ixãmnhĩx ixte mẽ kãm kapêr jarênh mex o ri mẽ hkôt ixpa kaxyw. Mẽ kot ja hã tanhmã ixto htã pa arĩ ixãmnhĩx mẽ kãm harênh mex o ri mẽ hkôt ixpa. Nê ixprĩ hã mẽ kãm Jesus kot tanhmã mẽ panê amnhĩ nhĩpêx to hã harê. Kormã mẽ kot hprĩ hã ja mar mex kêt.

²⁰ Tã ixte mẽ kãm ja jarênh kaxyw na pre Tĩrtũm mẽ hwÿr inhmê nhũm prem hã ijaxà pa arĩ mẽ hagjênh xà kamã ixkrĩ ho ixkrĩ. Jakamã kwa mẽ ixto Tĩrtũm wÿ kê tanhmã ixto ixihtÿx to pa arĩ mẽ kãm kapêr jarênh o ixkrĩ. Ja na Tĩrtũm kãm hprãm nê ijaxwÿja inhmã ja prãm.

*Kagà jatur xà**Korosê 4.7-8*

²¹ Nê ot pa mẽ awỳr Xikitre mẽ. Kot paj mẽ amã kagàja nhĩpêx pa nê kãm kugõ nhũm kupy nê ma mẽ awỳr o mỗ. Hãmri nê mẽ awỳr o pôj nê mẽ amã kugõ nê mẽ amã tanhmã ijarênh to ka mẽ ijarênh ma nê akĩnh nê. Xikitre na hte Pahihti mã tanhmã amnhĩ nhĩpêx mex to o pa. Kris kôt mẽ pahtõ na. Nê inhmã hapêê.

²² Tã ot pa mẽ awỳr kumẽ. Kê mẽ awỳr pôj nê mẽ amã ijarê ka mẽ kam ama nê akupỹm tãm akrã nê tee ri ixkukamã ajamaxpêr kêt nê.

²³ E ixkràmnhwỳjaja. Kê Mẽpahpãm Tĩrtũm mẽ Pahihti Jejus Krisja wa tanhmã mẽ akrã hto ka mẽ ajamakêtkati nê axàmnhĩx ri apa. Nê mẽ amã axpên kĩnh o ri axpên kôt apa. Nê mẽ apiitã wa hkôt ajamaxpêr mex o ri apa.

²⁴ E mẽ amã mẽ panhõ Pahihti Jejus Kris kĩnh rãhã ho apa xwỳnhjaja. Kê Tĩrtũm mẽ ato mex nê mẽmoj to mẽ akutã nojarêr rãhã ho pa.

Tã ãm ja pix na hapêx. Ixpê Pawre na pa mẽ awỳr kagàja nhĩpêx nê kumẽ.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files
dated 29 Jan 2022

383a4e22-34cd-505f-9cc2-2f9921e7aa9f